

Ada keperluan kaji semua projek diumumkan Najib

Nik Amirulmu' Min Nik Min

14 Mei 2018

Sumber : <http://www.sinarharian.com.my/edisi/pahang/ada-keperluan-kaji-semua-projek-diumumkan-najib-1.834261>



Chean Chung bersama petugas pusat khidmat Dun Semambu.

KUANTAN - Kerajaan mungkin akan mengkali semula projek pembangunan yang diumumkan bekas Perdana Menteri, Datuk Seri Mohd Najib Tun Razak termasuk di Pahang sebelum PRU14.

Adun Semambu, Lee Chean Chung berpendapat, ada keperluan projek tersebut dikaji semula sama ada ia benar-benar untuk kemudahan rakyat atau sekadar janji pilihan raya.

Menurutnya, bagaimanapun segala keputusannya bergantung kepada kerajaan pusat untuk membuat penilaian sama ada meneruskan atau membatalkannya.

"Mungkin kerajaan Pakatan Harapan (Harapan) akan tubuh jawatankuasa khas untuk tujuan ini.

"Bagi saya, sekiranya projek itu benar-benar untuk kemudahan rakyat, ia boleh diteruskan,"katanya kepada media sempena pembukaan rasmi Pusat Khidmat Adun Semambu di Jalan Lim Hoe Lek di sini, tadi.

Menurutnya, kerajaan yang diterajui Perdana Menteri, Tun Dr Mahathir Mohamad sudah memberikan komitmen untuk membawa perubahan kehidupan rakyat di negara ini ke arah yang lebih baik.

"Kita fokus kepada usaha bantu rakyat bukan nak balas dendam atau burukkan BN dan Pas," katanya.

Sementara itu, mengulas isu perlantikan Menteri Besar Pahang, Chean Chung berkata, perkara itu perlu diselesaikan segera dalam masa terdekat.

"Sekarang masa untuk semua wakil rakyat yang dipilih pada PRU14 bekerja jadi isu perlantikan menteri besar juga perlu dipercepatkan," katanya.

Chean Chung berkata, biarpun Harapan kekal sebagai pembangkang di Pahang, beliau komited untuk membantu rakyat dengan memulakan tugasnya sebagai adun, hari ini.

"Ini cara terbaik sebagai menghargai pilihan rakyat pada PRU14 jadi mulai hari ini, saya mula bekerja serentak dengan bermulanya operasi Pusat Khidmat Dun Semambu yang dibuka secara rasminya.

"Pusat khidmat ini akan dibuka Isnin hingga Jumaat bermula jam 12 tengah hari hingga 4 petang jadi kami mengalu-alukan orang ramai untuk menggunakan kemudahan disediakan ini dalam menyampaikan permasalahan, aduan dan sebagainya," katanya.

Menurutnya, beliau juga mengaktifkan talian hotline 018-2290073 untuk kemudahan orang menghubungi pusat khidmat itu sama ada melalui panggilan atau Whatsapp.

Serentak dengan pembukaan pusat khidmat beliau itu, Chean Chung berkata, antara isu yang diberi keutamaan untuk diselesaikan segera termasuk berkaitan dokumen pengenalan diri melibatkan beberapa kanak-kanak di sini.

'Perkara ini perlu disegerakan kerana ia melibatkan masa depan mereka terutama peluang untuk pendidikan dan sebagainya.

"Kita dapati dalam kes-kes ini, keluarga lambat daftarkan kelahiran anak mereka disebabkan ibu berstatus bukan warganegara," katanya.

Beliau berkata, orang ramai yang mungkin mengalami kes serupa disarankan tampil merujuk ke pusat khidmat Dun Semambu untuk tindakan lanjut.